



# PREZIDÉNSIA KONSELLU MINISTRUS

VI GOVERNUN KONSTITUSIONÁL

DÍLI, LORON 10 FULAN-MAIU TINAN 2016

## KOMUNIKADU IMPRENSA

### **Sorumutuk Konsellu Ministrus nian iha loron 10 fulan-maiu tinan 2016**

Konsellu-Ministrus hala'o sorumutuk iha loron-tersa ne'e, iha Palásiu Governu, iha Dili, no aprova ona:

#### **1. Dekretu-Lei kona-ba alterasaun ba Dekretu-Lei n.11/2012, kona-ba Ospital sira Servisu Nasionál Saúde nian**

Estatutu Ospitalár, ne'ebé hetan ona aprovasaun iha sorumutuk Konsellu Ministrus nan iha loron 28 fulan-setembru tinan 2011, hatudu ona, durante ninia aplikasaun, katak modelu jestaun ospitalár ne'ebé Konsellu Ministrus propoin, iha aspetu balun, la tuir prátika ne'ebé ezekuta iha jestaun ospital sira Servisu Nasionál Saúde nian. Verifika ona katak modelu autonomia administrativa, finanseira no patrimoniál seidauk aplika ba unidade ospitalár sira hotu, unidade sira ne'e balu téknikamente seidauk iha preparasaun atu fó servisu ne'ebé efikás. Tanba ne'e, Konsellu Minsitrus aprova ona Dekretu-Lei foun, ne'ebé sei hadi'a falla sira ne'ebé eziste.

#### **2. Dekretu-Lei kona-ba Estatutu Ospital Nasionál Guido Valadares (ONGV)**

Iha sorumutuk Konsellu Ministrus iha loron 21 fulan-setembru tinan 2015, Governu rekoñese ONGV hanesan organizmu administrasaun indireta Estadu nian, hodi fó ba organizmu ne'e autonomia administrativa, finanseira no patrimoniál. Diploma ne'e aprova Estatutu sira ONGV nian, iha ne'ebé inklui kompeténsia, norma funsionamentu nian no servisu sira. Husi pontudevista territoriál nian sira, ospital ne'e garante prestasaun kuidadu saúde nian ba Munisípiu Dili, Ermera Likisá, Manatutu no Aileu to'o ba tempu ne'ebé Ospital Munisípiu sira nian harii ona.

#### **3. Proposta kona-ba ratifikasaun ba Konvensaun ba Rezolusaun Diferendu kona-ba Investimentu entre Estadu no Investidór sira husi Estadu seluk.**

Konsellu Ministrus aprova ona proposta kona-ba Rezolusaun ne'ebé buka atu ratifika iha orden interna Timor nian ba CIRDI – Sentru Internasionál ba Arbitrajen Disputa sira kona-ba Investimentu, tratadu ida internasionál multilaterál. CIRDI estabelese mekanizmu rezolusaun alternativa ba konfliktu sira entre



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@gmail.com  
(+670) 33 310 608

Estadu no investidór sira husi Estadu seluk ne'ebé sai mós hanesan parte iha Konvensaun ne'e. Ho aprovasaun ne'e, Timor-Leste hakarak konklui prosedimentu ratifikasaun ne'e, liuhusi proposta ne'e ba Parlamentu Nasionál.

#### **4. Rezolusaun Governu nian kona-ba Estratéjia Nasionál Mitigasaun Lixu Tasi nian**

Protesaun meu ambiente no prezervasaun rekursu naturál sira nu'udar objetivu fundamentál Estadu Timor nian, tuir hatudu iha Konstituisaun. Iha Timor-Leste, lixu tasi nian sai nu'udar ameasa ida ne'ebé grave tebes ba saúde, ba ambiente no ba biodiversidade, tanba ne'e presiza duni atu autoridade pública sira promove adosaun política pública a atu previne lixu tasi nian ne'e la bele habelar liután. Lei Baze Ambiente nian hatete katak tenke iha responsabilidade hodi hadi'a servisu sira kona-ba ambiente no dezvoltamentu asaun koordinasaun no kooperasaun nian sira entre entidade pública no privada sira. Jeralmente, atribui mós responsabilidade atu promove, proteje, conserva no uzu sustentável liuhusi aplikasaun política, lejislasaun, programa, planu no projetu sira.

#### **5. Proposta kona-ba Rezolusaun ba Retifikasaun Akordu entre Timor-Leste no Indonézia relaciona ho Atividade sira Kooperasaun iha área Defeza nian**

Konsellu Ministrus aprova ona proposta rezolusaun nian ne'ebé buka atu ratifika akordu entre país rua ne'e iha área Defeza nian. Objetivu husi akordu ne'e atu promove relasaun bilaterál iha área Defeza nian, tuir ninia lejislasaun nasional sira, ho karta husi Nasoins Unidas no Norma sira seluk ne'ebé universalmente rekoñese ona hanesan direitu internasionál.

#### **6. Proposta lei kona-ba alterasaun dahuluk ba Lei n. 10/2009, leron 5 fulan-agostu (Estatutu Remuneratóriu Majistradu Judisiál sira, Majistradu sira Ministériu Públiku nian sira no Ajente Defensoria Pública nian sira)**

Hafoin análise iha sorumutuk Konsellu Ministrus nian iha leron 12 fulan-abril tinan 2016, Governu aprova ona alterasaun dahuluk ba Estatutu Remuneratóriu husi atór judisiál prinsipál sira. Atualizasaun tabela salariál nian hadi'a iha aspetu balun sistema retributivu ne'ebé Majistradu Judisiál sira, Majistradu Ministériu Públiku nian sira no Defensór Públiku sira uzufri.

#### **7. Alterasaun ba Dekretu-Lei n. 42/2008 ne'ebé transforma Rádiu no Televizaun Timor-Leste ba Empreza Pública**

RTTL hanesan empreza pública ida ne'ebé maka hetan tutela no superinténdensia husi membru Governu nian ne'ebé sai hanesan responsável ba Komunikaun Sosiál. Konsellu Administrasaun RTTL oras ne'e daudaun konstitui husi Prezidente ida, vogál na'in haat ne'ebé membru Governu ne'ebé fó tutela maka nomeia, membru ida Ministériu Finanzas maka nomeia no membru ida traballadór sira maka hili. Ho alterasaun ida ne'e, atu hodi hamenus número husi membru Konsellu Administrasaun nian no inklui mós Vice-Prezidente na'in rua ba área Media nian no Servisu Korporativu sira nian, ba tempu tomak, atu nune'e bele fó apoiu ne'ebé lalais ba Prezidente iha jestaun leron-loron empreza ne'e nian.



Promove mós halakon Konsellu Opiniaun nian, tanba hatudu ona katak órgaun ida ne'e laiha atividade no la-persiza.

Konsellu Ministrus mós analiza ona:

### **1. Relatóriu kona-ba Atividade no Konta sira husi Misaun Apoiou Tékniku nian ba Prosesu Eleitoral Saun Tomé no Prínsipe nian**

Hetan aprovasaun iha sorumutuk Konsellu-Ministrus nian iha loron 9 fulan-fevereiru tinan 2016, no bainhira prosesu eleitoral iha Saun Tomé no Prínsipe nian remata, Misaun Apoiou Tékniku nian ba Prosesu Resenseamentu Eleitoral apresenta ona relatóriu, analiza ona gastu finanseiru ne'ebé maka iha relasaun ho atividade sira ne'e no aprova kontinuasaun apoiu iha âmbito prosesu eleitoral nian.

### **2. Partisipasaun Estadu nian iha investimentu TL Cement, Lda.**

Hafoin aprovasaun ba rezolusaun n. 43/2015 nian kona-ba Projetu Investimentu iha Unidade Estrasaun Kalkáriu nian ida no Produsaun Simentu iha Baukau, iha sorumutuk Konsellu-Ministrus nian iha loron 24 fulan-novembru tinan2015, no autoriza tiha Akordu Espesiál Investimentu nian ba Projetu TL Cement, Lda. iha Baukau, iha sorumutuk Konsellu-Ministrus nian iha loron 5 fulan-abríl tinan 2016, ekipa téknika interministeriál apresenta ona ba Konsellu-Ministrus informasaun kona-ba dezvoltimentu projetu ne'e nian, nune'e mós ninia rekomendasau sira.

### **3. Relatóriu Tékniku husi Fundu Dezenvolvimentu Kapital Umanu nian**

Ministériu Planeamentu no Investimentu Estratéjiku apresenta ona relatóriu ezekusaun finanseira husi Fundu Dezenvolvimentu Kapital Umanu (FDCH- sigla iha lia-portugés), relasiona ho liña ministeriál sira.

FDCH hanesan instrumentu ida ne'ebé konsentra kompeténsia sira atu determina, finansia no tau iha prátika polítika Governu nian tomak ba kualifikasaun no formasaun kapital umanu nasaun ne'e nian. Ho objetivu atu promove transparénsia, responsabilidade no jestaun di'ak kona-ba ezekusaun programa sira no projetu hirak ne'ebé Fundu ne'e finansia.

